

欽定平定教匪紀略

欽定平定教匪紀畧卷五

九月二十一日

甲申

上諭內閣日本月十五日有畿南亂民勾引太監突入紫禁城滋事當經官兵殲捕淨盡賊匪總頭目林清經步軍統領派營弁番役四人立時擒獲現在京城內外安堵如常或有一二逃逸匪徒著步軍統領五城順天府及直隸總督派員留心緝拏

其京城及附近村庄概不許藉搜查爲名擾累良善如有讐攀誣陷等事查明按律治罪匪黨已除良民宜各安生理毋相驚擾將此旨刊刻謄黃遍行曉諭知之

上又諭內閣曰河南滑縣知縣強克捷因拏獲賊匪多名被匪黨刦獄入城戕害殊堪憫惻著照陣亡例給予卹典

上又諭內閣曰格布舍蘇爾慎俱著授爲領隊大臣
格布舍帶火器營官兵一千名馳往直隸大名一
帶赴溫承惠軍營蘇爾慎帶健銳營官兵一千名
馳往山東曹州一帶赴同興軍營所有軍裝馬匹
等項事宜著各該衙門及沿途地方官妥速經理
上又諭內閣曰現在天氣漸寒不宜工作所有圓明
園現辦之淳化軒工程著卽停止其餘各處工程

俱著俟明歲春融分別緩急再行奏明辦理

上又諭內閣曰紫禁城內暫設之內火器營兵六百
名著撤二百名回原營休息其紫禁城外暫設之
護軍九百六十名卽著撤回原營

是日溫承惠奏言

臣

於十九日途次滿城縣接

據稟報長垣開州東明三處邊界俱有賊匪焚
掠開州拏獲匪犯四十餘名東明拏獲三十餘

名現在長垣東明等處大名府知府莫景瑞副
將佛雲帶兵駐守開州係長垣東明往來要道
總兵拴住副將舒凌阿亦已帶兵二百六十餘
名前往堵禦至河南滑縣失守之後聞匪徒屯
聚道口及大伾山等處分投滋擾衛輝府城亦
甚危急滑縣尙被賊匪占踞另有千餘人在小
渠村楊家莊余家寨三處屯聚並偷渡衛河以

致宜溝驛居民聞風逃竄該處係通直隸磁州
大路業於漳河設卡防堵又廣平府屬成安縣
距濬縣祇百餘里經拴住撥兵一百名前往防
堵又據清豐縣知縣何志清稟報山東定陶曹
縣失事之後城武縣亦被賊圍攻並竄入金鄉
濮州一帶勢甚猖獗查直隸長垣東明開州三
處賊匪祇在邊境焚搶且經拏獲數十名尙易

翦除惟山東河南兩省連陷城池賊氛散漫

臣

所調各官兵止正定鎮六百名已抵大名其

臣

標兵一千名甫抵順德提標宣化鎮各官兵均

尙未過保定現已飛檄傳催

臣

亦兼程馳抵大

名齊集官兵相機進剿至

臣

前奉

諭旨因未悉禁門滋事之賊係何處民人是以尙未

自行奏請治罪茲奉

諭旨悚懼難名惟有仰懇

皇上天恩將

臣

先行革職留於軍營効力

臣

惟當奮

不顧身力圖報効

同日素納奏言查此次匪徒滋事賊匪俱有白
旗刀矛可見蓄意已久其爲邪教無疑現在探
得滑縣界內之賊多於長垣爲首之犯似在滑
縣之內又據磁州知州何道榜差役往河南境

內探得賊匪情形並據東明縣稟報擊獲山東
賊探董法松一名訊據供稱山東定陶縣邵家
樓居住之邵舉人不知何名於本月初十日聚
集二三千人攻破定陶曹縣與滑縣之賊並非
一夥等語謹抄錄賊供恭呈

御覽現在正定鎮臣拴住帶兵一百六十餘名前赴
開州後又續到步兵三百名臣已催令連夜前

往聽撥至東明長垣兩處皆在開州之南臣已
咨會鎮臣酌量添兵防守均奏入

上命軍機大臣傳諭溫承惠曰本日溫承惠奏直隸
長垣東明開州三處賊匪俱在邊境滋擾現已拏
獲數十人防堵尙易惟河南濬縣有被攻之信衛
輝府城亦在危急滑縣被賊占踞另有千餘人分
起屯聚偷渡衛河山東賊匪現亦竄入金鄉濮州

一帶等語山東河南地方賊匪連陷數縣占踞滋擾亟當趕緊剿辦現在京城滋事匪徒業已全數捕獲其首逆林清就獲之後並將其妻子親屬悉數擒拏已無一名漏網連日將各逆犯駢誅戮割辦理完竣溫承惠不必顧及京畿惟當統率師干將河南山東一帶賊匪痛剿淨盡刻下又據素納奏稱河南滑縣界內之賊多於長垣其爲首之犯

似在滑縣之內等語看來河南賊勢甚張尤當先
往痛剿著溫承惠親統大兵隨路將直隸邊界肅
清卽速馳赴河南與高杞約會將滑縣濬縣及大
伾山一帶之賊合力夾擊務將賊匪就地殲除勿
使與山東之賊連合滑縣之賊剿淨卽與同興高
杞會兵將曹單之賊兜圍一鼓殄滅現已派領隊
大臣格布舍帶領火器營官兵一千名由保定一

路馳赴溫承惠軍營派領隊大臣蘇爾慎帶領健
銳營官兵一千名由山東一路馳赴同興軍營幫
同剿捕溫承惠不妨先爲揚言以卽日有京兵五
萬前來合剿以壯軍威而寒賊膽是亦兵貴先聲
之一道該督失察謀逆叛匪其咎本重部議革職
念伊正在帶兵已加恩改爲革職留任溫承惠此
時不必心懷疑懼惟當一意剿賊速成大功尙可

施恩格外也

上又命軍機大臣傳諭同興曰山東曹定單三縣連
被賊匪滋擾勢甚鴟張前據該撫奏稱在曹州一
帶厚集兵力前往剿辦日內調派之兵想已陸續
到齊可以尅期進兵本日已派格布舍爲領隊大
臣帶領火器營兵一千名前赴河南派蘇爾慎爲
領隊大臣帶領健銳營兵一千名前赴山東幫同

剿辦該撫接奉諭旨後不妨先爲揚言以卽日有
京兵五萬前來合剿使賊匪聞風膽落當可益壯
軍威此亦兵貴先聲之一道蘇爾慎行入東境應
由何路前赴軍營著同興隨時知會令其遄行本
日又據素納奏訊據賊探供稱山東定陶縣邵家
樓居住之邵舉人不知何名於本月初十日聚集
二三千人攻破定陶曹縣與滑縣之賊並非一夥

等語賊匪中竟有舉人爲首聚衆滋事實出情理之外是否武舉抑係文舉係何名字著同興查明具奏至目前賊勢豫省滑縣等處匪徒與東省同時犄角已令溫承惠先辦豫省其山東之賊著責成同興卽調集兵力親自督率將賊匪痛加剿戮如東境之賊辦竣再馳赴豫省邊界會同溫承惠高杞四面兜圍將豫境賊匪聚而殲旃毋稍稽遲

上又命軍機大臣傳諭高杞曰本日溫承惠奏各處探報賊匪情形豫省賊勢甚屬鴟張必應速爲擒捕現已派格布舍爲領隊大臣帶領火器營兵一千名馳赴河南幫同剿辦刻下高杞業已馳抵豫省著督率色克通阿將滑縣濬縣大伾山一帶屯聚之賊相機剿捕俟溫承惠帶兵到豫兩面併力夾擊務將賊匪就地一鼓殲除毋使蔓延爲要

上又命軍機大臣傳諭那彥成曰本日據溫承惠奏
直隸長垣開州東明俱有賊匪在邊境焚掠河南
滑縣賊匪偷渡衛河山東賊匪竄入金鄉濮州一
帶現在該三省交界處所賊匪連陷城池勢頗猖
獗軍務緊急著那彥成迅速星夜馳抵軍營卽接
受欽差大臣關防籌辦堵剿

同日

上諭內閣曰溫承惠劉鑑之費錫章於所轄地方失
察匪徒潛匿以致擅入禁城經吏部分別議以革
職降調實屬咎所應得姑念溫承惠現在帶兵著
加恩改爲革職留任劉鑑之費錫章到任未久著
加恩改爲降四級留任

上又諭內閣曰宛平縣知縣陳鉅鏘盧溝司巡檢陳
紹榮南路經制外委黃文仁於所屬地方匪徒潛

匿毫無覺察其咎甚重俱著革職發往伊犁効力
贖罪南路同知張步高念係分轄之員著革職交
與劉鑑之等差遣委用

是日拉旺多爾濟福長安等奏言竊_臣等於十

九日遵

旨帶兵前赴董村地方查拏叛匪於是日申刻前抵
該處查屈四屈二屈三等犯已經通州拏獲解

案當又搜獲屈四妻子等男婦十六名面交通
承道任烜收管任烜亦親自拏獲四名一併解
部嚴審所有在逃餘匪飭該道上緊嚴拏臣等
隨至董村起程臣拉旺多爾濟索特那木多布
齋瑪呢巴達拉蘇爾慎帶領健銳火器二營官
兵進雙橋門由

南苑內搜查出黃村門臣福長安格布舍策丹帶

領密雲滿兵併提屬各營馬蘭鎮標弁兵由

南苑外面搜查均於午未時先後齊至黃村查該
村及附近各處現在並無傳習邪教之人亦無
藏匿叛匪情形甚屬安靜奏入報

聞

九月二十二日配護理河南巡撫布政使台斐
音奏言竊臣先據濬縣知縣朱鳳森稟報縣城

被圍臣當卽飛飭鎮將速赴救援並探得兵過

各處間有賊匪埋伏十六日鎮臣色克通阿率

領將備行至濬縣石羊村卽有賊匪百餘人前

來迎敵官兵鎗礮齊發登時打死數十人餘俱

逃逸生擒二人時已昏暮當卽駐紮哨頭村訊

知賊衆聚於村東十數里先將獲賊正法十七

日卯刻官兵行三里許遇賊千有餘人公然拒

敵叅將張拱辰陳弼直前搏戰賊衆驚潰官兵
追殺三十餘里殲賊六七百人午後趕赴濟縣
城外該匪約有二千餘人占據山梁縣城被圍
運河石橋亦有賊匪把守阻隔我兵頗不得手
叅將張拱辰陳弼奮勇先登搶上石橋賊人抵
死抗拒守備蔣光奎黨得用彭永吉劉文煥千
總鄧殿魁劉學霖把總魏奇等帶領弁兵喊聲

大震緊跟搶占鎗箭齊發打死賊匪一千七八百人擒獲活賊一百餘名圍城立解餘匪竄逸馬兵王占魁搶得大纛一桿李復元搜出滑縣印信一顆并奪獲馬騾鎗刀旗幟甚多臣接到鎮臣知會并有派隨打仗之弁兵許儉等目擊情形據稟悉屬相符臣現卽飛札色克通阿張拱辰分兵濬邑實力搜捕并飭各屬一體堵截

毋使竄匪一名漏網探得賊匪現在占據滑縣

臣
立即移會

欽差大臣直隸督臣溫承惠山東撫臣同興並鼓勵

河北防堵兵衆會合堵剿以期一舉肅清仰紓

聖廛再此次打仗守城出力及効用行間文武各官

請擇其尤爲出力者另摺保奏受傷兵丁查止

一人業已飭醫調治又淇縣內黃等縣陸續稟

獲竄匪八名應同生擒各賊提省一併究辦

同日同興奏言

臣

連日據差探回稱賊匪多係

定陶曹縣之人祇於定曹一帶村莊潛匿晝則

劫掠鋪家夜則帶同妻子飲酒被脅者亦係本

村之人現俱遊奕觀望未敢近城似屬不難剿

辦據曹州府百歲稟報拏獲奸匪魏保僧人通

爵訊係定陶縣人梁添成差令探聽官兵消息

又據兗沂道熊方受稟報該道趕至曹縣督守
縣城拏獲賊匪十餘人又據金鄉縣吳堦稟報
該縣有匪徒十餘人在葦子坑地方起手裹脅
四五百人赴城南搶劫經河標叅將齊國珍帶
兵接仗殺賊二三十名卽四散逃逸其動手迎
敵者不過二十餘人又據魚臺縣稟報該縣拏
獲匪徒三人訊有賊夥百餘人在該縣南陽村

地方打造軍器各等情

臣

分飭將獲犯訊明正

法并派沂州協副將福寧阿帶兵馳赴南陽村

查明剿洗此外又派武定營兵二百名駐紮宛

州登鎮兵二百名幫守濟寧其臨清一路責令

本管及駐防兵三百餘名協同防守可保無虞

再據臬司劉大懿稟送獲犯朱成珍供詞據供

係曹縣扈家集人年三十歲堂兄朱成方於十

六年冬間拜直隸長垣縣人徐安輜爲師學習
震卦教先經教給我弟兄朱成來朱成文朱成
良朱成貴四人惟兄弟朱成瑞年幼尙未入教
我於去年二月纔從朱成方入教的朱成方合
兄弟朱成貴都常到滑縣去聽說滑縣有卦主
姓李手下管事的係于克敬馮克善劉輜明王
學禮數人金鄉頭領是崔士俊鉅野頭領是張

建木曹縣頭領是朱成方單縣頭領是程伯約
別處沒有頭領了八月初六日朱成方從滑縣
回來說李卦主吩咐九月十五日就要動手先
搶汴梁城直趨北京有坎卦林姓教主在北京
接應現在趕造旗子朱成方帶了旗樣到金鄉
等處散給衆人照樣趕造至今尙未回來我於
八月二十一日被拏哥子朱成來朱成文朱成

良都跑了兄弟朱成貴往滑縣去尙未回來我
素常知道朱成方的徒弟有同縣趙家港的趙
秉性荷澤張家灣東的趙欣臣等語除將該犯
供詞咨照溫承惠高杞外謹附摺奏

聞均奏入

上諭內閣曰台斐音奏本月十六日色克通阿率領
將備行抵濬縣石羊村有賊匪百餘人迎敵官兵

鎗礮齊發登時打死數十人生擒二人餘匪逃逸
次日卯刻色克通阿督兵行三里許遇賊千餘人
與官兵拒敵經叅將張拱辰陳弼直前搏戰賊衆
驚潰官兵追殺三十餘里殲賊六七百人午刻趕
赴濬縣城外該匪約有二千餘人占據山梁縣城
被圍運河石橋阻隔復經叅將張拱辰陳弼奮勇
先登搶過石橋賊人抵死抗拒官兵鎗箭齊發打

斃賊匪一千七八百人擒獲活賊一百餘人濬縣
圍城立解奪獲馬騾鎗刀旗幟甚多所辦甚好豫
境賊匪嘯聚搶劫茲官兵甫經接仗卽將該匪殲
斃二千五百餘人生擒一百餘名可見該匪等不
過烏合之衆經此番殲戮業已喪膽指日大兵會
集四面兜圍無難一鼓殲除總兵色克通阿叅將
張拱辰陳弼奮勇可嘉色克通阿著交部議敘張

拱辰陳弼著交部從優議敘張拱辰陳弼著高杞
查明該二人如向未得有翎枝著賞戴花翎以示
獎勵至摺內所稱此次打仗守城文武各官請擇
其尤爲出力者另摺保奏官弁効力行間奮勉出
力自當加之鼓勵但必須核實辦理勿蹈從前軍
營陋習稍涉瞻徇致有功者屈抑無功者冒濫方
足以服人心而勵士氣

上命軍機大臣傳諭高杞曰本日台斐音奏總兵色克通阿率領將備行抵濬縣殲斃賊六七百名復將占據山梁及屯聚石橋之賊打斃一千七八百名擒獲一百餘名濬縣圍城立解該匪等嘯聚搶刦一經接仗卽將匪徒殲斃二千四五百名生擒一百餘名可見烏合之衆不難一鼓殄戮現在該逆等大股賊匪蜂聚滑縣城內台斐音等已前赴

該縣圍捕著高杞迅卽馳赴該處趁此兵威壯盛之時將縣城內屯聚之賊四面嚴圍該匪等株守絕地正可聚而殲旃斷不可令其突圍漏網四散奔逸再現據獲賊朱成珍供詞內有逆匪定期於滑縣起手後先搶汴梁之語開封省會地方關係緊要著高杞卽飭知在城文武各員率領兵役嚴加防範鎮靜彈壓勿稍疎虞

上又命軍機大臣傳諭同興曰同興奏探得曹定一
帶賊匪潛匿村莊不難剿辦金鄉葦子坑匪徒經
官兵剿捕卽四散逃逸拒敵者不過二十餘人又
魚臺賊夥百餘人在南陽村打造軍器已飭副將
福寧阿順路剿洗等語看來東省賊勢零星竄匿
無難尅期殲淨本日據台斐音奏豫省濬縣一路
經色克通阿及叅將張拱辰等於十六十七兩日

率兵痛剿殺賊二千四五百人圍城立解豫省已
得勝仗東省賊匪自必聞風膽落計同興前調東
省各路官兵均已到齊著卽親自督率進剿乘豫
省事機順利之際將逆匪一鼓殄除毋稍稽延

上又命軍機大臣傳諭吉林將軍喜明黑龍江將軍
富俊曰現在直隸河南山東交界處所有匪徒聚
衆滋事業經調派官兵馳往剿捕若不能速就殲

除卽需添兵前往協剿吉林黑龍江兵丁素稱勇
健著喜明將吉林兵挑選一千名富俊將黑龍江
兵挑選一千名預爲準備吉林官兵令德寧阿色
爾滾帶領黑龍江官兵令蘇青阿達斯呼爾岱帶
領並著傳知該副都統等先期預備該將軍等將
一切軍裝器械備辦齊全俟一有諭旨調撥卽令
迅速起程勿稍遲緩

上又命軍機大臣傳諭溫承惠高杞同興日本日給事中陸泌奏請團練鄉勇以代賑濟以靖地方一摺據稱現在賊匪滋事各州縣地方官均有保障之責恐城廂村堡不能遍爲經理乏食窮黎難免被賊煽惑請令各州縣設立鄉勇以息附和等語直隸省南一帶及河南山東被災之區雖經撫卹賑濟但貧民乏食者多現在賊匪滋事之時自當

加意經理著傳諭溫承惠高杞同興各飭所屬勸諭附近村堡鄉民令其各自團練義勇創挖溝濠自相保衛免致被賊裹脅是亦堅壁清野之良策但不許令各鄉勇隨同打仗又蹈從前流弊也

臣等謹按國家設兵衛民前此川楚陝用兵時動輒雇募鄉勇隨征冊報不下數十萬人聚無藉之徒干不戢之禁去來無定桀驁不

馴當其戰勝之時已有難制之勢泊乎凱撤之際尤鮮善處之方遣之則爲游民羈之又成悍卒寧陝瓦石坪之案前鑒具在我

皇上燭照幾先慮周善後此次

採堅壁清野之議惟令團練義勇自衛其鄉不准隨同打仗蓋禁弊必預遏其源而弭患在先防其漸三省文武大吏暨領兵各員凜遵

訓言不敢復蹈前轍故地方收保障之益而軍行皆
節制之師逆賊一平晏然無事長治久安之
策非悉本於

一人之思深慮遠也哉

上諭內閣曰本日接據台斐音奏報總兵色克通阿
等帶兵一千名將豫境之賊痛加殲戮殺賊數千
名並生擒百餘人又據同興奏山東曹州之賊亦

被官兵斬獲甚多可見匪徒不過烏合之衆指日
溫承惠等所調大兵雲集即可撲滅淨盡所有昨
派之火器健銳兩營兵二千名著挑出預備此時
暫緩起程令格布舍蘇爾慎各帶巴圖魯侍衛四
員分赴豫東兩省幫同帶兵剿捕其挑備之兩營
兵丁如豫東二省續有奏請需用之處再令慶祥
桑吉斯塔爾帶往

同日軍機大臣董誥等會同刑部奏審出太監
楊進忠從逆一案得

旨此案續獲從逆之太監楊進忠係由巡視南城御
史及副指揮等偵捕嚴密先行拏獲同謀之林四
趙增從此究出楊進忠俾要犯不致漏網實屬可
嘉御史海齡給事中陸泌御史曹恩綬俱著加恩
賞給四品卿銜副指揮汪忠增著加恩賞給六品

陞銜其緝獲該犯捕役查明每人各賞銀三十兩
以示獎勵

九月二十三日

丙戌

上廷訊首逆林清賊目劉進亭從逆太監劉得財劉
金四犯盡法懲治凌遲梟示將林清首級傳示
直隸河南山東賊匪滋事地方

是日

上諭內閣曰本月十五日天理會逆首林清潛遣夥黨勾結內監伺朕未經回蹕之隙突入禁門謀逆將及大內經皇次子用鎗擊斃二賊王大臣等帶領官兵將賊匪以次殲捕淨盡首逆林清潛伏黃村步軍統領衙門遴派官役立時擒獲連日派軍機大臣會同刑部徹底研鞫本日朕復親自廷訊已將首逆盡法懲治寸磔傳首從逆匪犯一併駢

誅現在指名擒捕者不過一二醜黨無難尅日緝
獲按律懲辦賊匪事起倉猝實屬非常鉅變今數
日之間渠魁就戮餘孽悉平都城內外安堵如常
此皆仰賴

天

地

宗

社神靈默佑迅賜平寧朕感荷

厚恩不能言喻敬與中外臣民同承禔福謹於孟冬朔

日燭潔祀謝遣儀親王永璇代祭

天壇遣成親王永理代祭

地壇遣慶郡王永璘代祭

社稷壇

太廟本值時饗之期朕躬親行禮虔申昭假用答

鴻慈所有一應事宜著各該衙門敬謹預備

上又諭內閣曰本月十五日首逆林清潛遣逆夥數十人突入禁城滋事一案嚴訊現獲賊犯據供太監內竟有逆賊六人預謀引路其引賊入東華門者係劉得財劉金二犯引賊入西華門者係張太高廣幅二犯又王幅祿閆進喜二犯在內接應續據南城御史緝獲賊夥林四又究出楊進忠一犯

亦由西華門引賊入內該逆賊等罪惡滔天爲從來所未有除高廣幅一犯於是日經官兵殲斃外其劉得財等六犯俱按名捕獲無一漏網連日軍機大臣會同刑部研究本日朕親自廷訊盡法處治逆賊劉得財等堅供此外再無通同謀逆之人復加嚴詰首逆林清亦堅供在內同謀祇此七人更無餘黨所有本日執事站班文武大小各員人

等助惡逆犯覆載所不容若不盡數誅夷不足以彰憲典因派拉旺多爾濟等帶兵掩捕官兵未至董村卽望見該處火起延燒拉旺多爾濟等到彼撲息詢悉在逃逆賊縱火焚燒乘間四逸而良民猝見兵火亦不免驚怖奔逃輾轉溝壑者此外兵役搜捕想各居民亦無不驚擾因逆賊而累及良民朕思之轉爲不忍現在就獲各逆犯俱經嚴訊

伏法首逆劉林卽林清本日廷訊盡法懲治寸磔
傳首其妻子親屬等均一一按名捕獲照律緣坐
鉅案已結毫無株連念附近良民因此等奸宄滋
事間致失所朕斷不肯因近郊有數十莠民或稍
減愛憐赤子之心著加恩將大興宛平二縣本年
應徵錢糧全行豁免以示憫恤現在近畿各處誠
恐有一二餘犯在逃尙須嚴密偵緝已嚴諭官吏

等確訪指名擒捕不許波及無辜百姓等無得聞風驚懼自形紛擾惟當感激朕恩安靜守法勉爲良善共享太平之福其或冥頑不靈受人愚惑甚至隱匿奸黨一經官吏訪獲必從重治罪不貸將此刊刷謄黃通諭知之

臣等謹按治之要安民爲本逆賊構亂郊

圻氛躔

禁闕

鑿與一至天清地寧固已鬼蜮潛形豺狼屏跡矣然
倉猝之時莠良莫辨紛紜之際反側易生或
無故而相驚或訛言之四起自非

仁慈怙冒之德大其

含宏非所以安善良而除俶擾也我

皇上於廷訊逆黨之後載

頌德音

詔書寬大不肯因近郊數十莠民稍減愛憐赤子之
念

誠意感孚人心安定故平大亂而衆不疑葳鉅案而
民不擾熙熙皞皞共享太平洵

如天之無不疇如地之無不載已

上又諭內閣曰本月十五日在內值日之署護軍統

領楊澍曾業已革職發遣是日禁門值班官員兵
丁俱係鑲黃旗護軍營該管護軍統領明志平日
訓練無方致兵丁不能禦賊亦有應得之咎明志
著卽革職其蒼震門東華門西華門該班官員兵
丁查明捕賊被戕者著加恩照陣亡例賜卹捕賊
受傷者准其將功抵過餘俱著拏交刑部分別治

罪

是日協辦大學士兩江總督百齡奏言竊臣於

桃莊工次接准山東撫臣同興咨會直隸長垣

縣匪徒戕官滋事已奔赴東省曹州一帶等情

當卽飛飭徐州鎮總兵沈洪帶領將弁兵丁攜

帶軍火器械在於交界要隘各處嚴密堵截並

飭府州縣會營防守旋又探聞長垣匪徒戕官

劫獄延及東省之定陶曹縣單縣豫省之滑縣

濬縣淇縣等處肆意滋擾殊堪髮指查曹單等處與江蘇安徽兩省地方毘連亟應趕緊分路協防勿使闖入隨飛檄署壽春鎮總兵陳均選帶弁兵星馳堵禦並移會提臣烏爾卿額一體

籌備

臣

現調署中軍副將馬濟勝等選帶督標

兵五百名城守營兵一百名叅將戴文星等選帶鎮江兵三百名由江浦揚州分途前進仍恐

官兵到彼需時徐州鄰界地方或致民情惶惑

臣先就近選帶漕標兵四百名河標兵二百名

俟一二日內布置齊備卽以查勘河道爲名督

押起程馳赴該處或堵或剿相機籌辦不敢稍

涉張皇亦不敢意存輕忽並一面行知狼山鎮

總兵尙維侗挑備官兵四百名派委妥練將弁

接續前進共計調派官兵二千名以壯聲威而

資捍禦

同日山東兗州鎮總兵陳廣寧奏言竊臣於十

三日馳抵曹州府城卽將所帶弁兵一百名分

防巡查人心稍定連日拏獲城廂左近之賊匪

探事奸細多名逐加研訊此內有僧人通爵李

道魏保邱猱張柱祝占常高成李狗任士和王

公揚王朝倫等十一名俱供認在於定陶曹縣

二處戕官劫獄並附近村莊地方屯紮俱懷挾
奉天開道白旗及器械血衣兇刀等件當卽恭
請

王命正法梟示差探匪徒等裹脅有二三千人現在
府城正南交界潛伏窺伺聞撫臣同興已調集
重兵前來臣所轄各營兵丁除分派防堵鉅野
金鄉嘉祥等縣外現在東昌梁山等營已到兵

二百名俟調兵齊集將賊匪一鼓殲除仰紆

聖廛均奏入

上命軍機大臣傳諭協辦大學士兩江總督百齡曰
百齡奏准同興谷會直隸長垣縣匪徒滋事已竄
赴東省曹州一帶當卽飛飭各鎮將選派弁兵於
江蘇安徽兩省交界地方分路協防該督並就近
選帶標兵馳赴徐州相機籌辦所辦甚是東省曹

單一帶匪徒向東南竄擾與江境地界緊相毘連
徐州鎮沈洪昨已有旨令先帶兵一千名迎頭堵
剿百齡現親帶弁兵前赴徐州可以彈壓邊境如
或賊匪被剿緊急有竄入江南信息該督卽添調
弁兵相機剿辦勿令賊匪一名闖入江境

上又命軍機大臣傳諭同興曰總兵陳廣寧帶兵防
賊因同興尙未到彼將曹州一帶現在賊情奏報

尚無不合此後同興到彼則一切剿捕情形均應
由同興具奏該總兵不許列名以符體制此時該
總兵帶兵有限祇可防守曹州府城不必以有限
兵力冒昧擊賊不能制勝轉挫銳氣同興現調各
路官兵計已到齊該撫卽親自督率將賊匪併力
兜擊務期一鼓撲滅毋稍蔓延

是日軍機大臣董誥等會同刑部奏言臣等連

日審訊謀逆各犯將逆賊等有無潛赴烟郊滋事之處逐一根究據逆賊屈四供稱我係通州董村人年三十六歲經劉第五引我入教念真空家鄉無生父母八字本年八月十四日林清叫劉第五派我辦一二百人帶到烟郊起事後因人少我祇有五十多人不敢前往就在五十多人內挑選十人來京進

東華門彼時林清給我奉天開道白旗一面刀二把餘人各執刀一把白布二塊我帶同李元隴鄧二周三周四張泳瑞祝六套任二高五安大卽安懶泰張泳貴卽張五來京起事高五安懶泰張五三人畏懼未來我與李元隴等七人先後至

東華門外取齊我們見在前走的夥黨進門鬧事

門已關閉跑回藏躲今被拏獲等情謹將該犯
及其餘各犯供詞繕呈

御覽其餘各衙門陸續送到人犯容逐一訊明次第
辦理奏入報

聞